

Umiartortut atorfinitsitaasarnerannut pissutsit pillugit inatsimmi Kalaallit Nunaanni naalagaaffigisami nangaanartitanik pillugu atuukkunnaartitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Ane Hansen, Inuit Ataqatigiit)

Akissuteqaat

(Inuussutissarsiornermut, Suliffeqarnermut, Niuernermit Nukissiuuteqarnermullu Naalakkersuisoq)

Aappassaaneerera

Naalakkersuisut sinnerlugit matumuuna Inuussutissarsiornermut Aatsitassanullu Ataatsimiititaliaq qutsavigissavara peqqissaartumik ataatsimiititaliami sulisimanerat pillugu.

Ataatsimiititaliap isumaliutissiisummini Naalakkersuisut qinnuigisimavaat ilisimatitsisoqarnissaanik naalagaaffiup naalagaaffeqatigiinnermi suliassaasa aamma Namminersorlutik Oqartussat suliassaasa sukut killeqarnerat pillugu, umiartortunik atorfiniitsisarnermut atatillugu. Naalakkersuisoqarfiup naalagaaffimmi oqartussat suliaq pillugu ataatsimeeqatigisimavai, soorluttaaq aamma allakkatigut attaveqartoqarsimasoq.

Ataatsimiititaliap isumaliutissiisummini Naalakkersuisut aamma qinnuigisimavai ilisimatitsissutigineqassasoq sulianik angerlaassinissamut nassuiaasiap killiffia pillugu. Naalakkersuisut Siulittaasuata Naalakkersuisoqarfiata suliassap aallarnisarneranut atatillugu Danmark-imi Statsministeriaqarfik attavigisimavaa, Danmark-imi ministeriaqarfinniit ataasiakkaaniit kisitsisinik paasissutissanik pissarsiniarnermut atatillugu, taamaaliornikkut paasissutissarsiviginarlugu danskit oqartussaasuisa suliassaqarfimmik angerlaassinissarput qanoq akeqassanersoq nalilersimaneraat pillugu. Statsministerialu tamatuma kingorna finansministeriaqarfimmut saaffiginnissimavoq piumasaralugulu suliassaq taanna tigussagaa.

Naalakkersuisut Siulittaasuata Naalakkersuisoqarfia maannamut paasissutissanik danskit finansministeriaanniit suli tigusaqarsimangilaq, kisiannili ilisimatinneqarsimalluni paasissutissat 2017-imi - aasaq sioqqullugu nassiuunneqarsinnaassasut. Paasissutissallu pineqartut naatsorsuutigineqarpoq nassuiaasiassami annertuutut inissisimanissaat.

Tamanna tunuliaqutaralugu Naalakkersuisut inassutigaat Inuussutissarsiornermut Aatsitassanullu Ataatsimiititaliap allannguutissatut siunnersuutaa akuersissutigineqassasoq.